

LA SAUNIERO E LOU GARDIAN

La chato d'un saunié d'Aigo-Morto que manjovo dins si sege an, se devinè, un jour, dins li pra dòu Queila.

Counfiado à soun peirin pèr soun paire, veguè aquèu jour, pèr lou proumié cop, uno ferrado.

Ié didien Manideto. Ero uno chato tras que poulido. Ero estado abarido sènsò joio brusissènto, sènsò marrit eisemple e sènsò charpin. Soun peirin Alabert , travaillavo dins l'admenistracioun e l'aviè rendudo mai saberudo que la majo part de si parièro. Manideto, naturalamen seriouso, aviè un caratère egau, legissié 'mé plesi, broudavo soun prouvesimen. A la recordo de la sau, se mesclavo pas i danso nimai i cant dis oubrié.

Bamboche, gardian de trio, festejaire, galo- bon- tèm, amavo li poulidi femo. Mai, vesent aquelo chatouno douço e clafido de delicadesso aguè, pèr lou proumié cop de sa vido un sentimen que counessié pas.

Sabié pamens que lou salinié baiarié pas sa chato à un ome sènsò fougau ni oustau, à un gardian sènsò dardeno. Dins li ferrado e li plan de carreto de touto l'encountrado, Bamboche fasié la joio di badaire que venien de pertout pèr lou vèire sauta à la partègo, expandi li biòu negro au sòu, lis aresta en li pougnet de soun ficheiroun. Li picamen de man e l'estrabort d'òu monde saludavon toujour li jo dangeirous de Bamboche.

Lou galant e jouine gardian aviè un biòu que i agradavé proun : lou Sangar. Matrassa dins uno curso espagnolo, lou biò èro à mand de mourri de si blessaduro.

Manideto aguè l'idèio de lou gari pèr de suen atenciouna, de caresso. Touto une semanado ié pougiguè d'erbo, d'aigo, lou reviscoulè tant bèn que la bestiasso se veguè presto pèr la curso d'Aigo-Morto de dimenche d'après.

Quand veguè Sangar tant bèu, tant pimpa, Bamboche que cresié soun biòu favourit mouribond dins quauque cantoun de palun aguè uno meno d'esblèugimen. Coumprenquè que Manideto aviè sauva soun Sangar.

Bamboche gramacié la chato eme tendresso e respèt : « Vous sias menado noun coume uno femo feblo e crentouso mai coume l'ome lou mai valènt. Vous ai visto pas que tres cop e me semblo que vous couneisse dempièi l'enfanço. Queto es dounc aquelo afecioun misteriouso que fai de ièu un ome novèu ? »

Manideto, trempelouso, chauchihavo la franjo de soun plechon. Pièi, se desgajant doucament de l'estrencho dòu juvenome, se boutè à resquiha, à pas lougié, jusqu'à la porto de soun oustau.

Es d'aquèu moument que lou juven prenguè uno grandò resolucioun. Veguè lou proupietàri d'uno manado lou jour d'uno ferrado. Avié, aquèu catau, proun de biòu qu'avié pas encaro marca au fèrre. Avien tres o quatre an e lou travail èro trop dangeirous pèr sis ome. Bamboche faguè lou pache de li marca soulet se lou catau ié baiavo li bestio marcado à soun chiffre.

Bamboche encambè soun ègo qu'endihè, espoussè sa blanco crenièro comme pèr s'aquissa au coumbat. Touto la niue, sensò avé la mendro grafignaduro, Bamboche

pouchounè, courseguè, remenè e marquè de palusen. Pèr dessus lou mercat, lou pelot i semoundè soun doumtaire Drapèu.

Un mes s'èro tout just debana qu'un jouious trignoun anouciavo un maridage.

Ansi fuguè menado à bono fin, uno entrepresso que l'amour soulet poudié ausa e faire reüssi : lou maridage d'un gardian e d'uno saunièro qu'aco s'èro jammai vist en Camargo.

Vuèi, lou terradou de Bamboche es un tenament maravihous que si biòu soun couneigu dins tout lou pais. Coume touto saunièro de raço, Manideto ié ten soun rèng coume fau. Soun ome a fa de sa vieio ègo un chivau d'atalage que li carrejo, en mestro, dins un poulit cabrioulet i curso e i ferrado.